



Број/Број: **01/2а-50-1-2-57/09**
Сарајево/Сарајево, 15.12.2009.

ZAPISNIK
57. sjednice Komisije za vanjske poslove
Predstavničkog doma Parlamentarne skupštine BiH,
održane 15.12.2009.

Sjednica Komisije počela je u 12 sati. Sjednici su prisustvovali: Slavko Matić, Husein Nanić, Azra Alajbegović, Denis Bećirović i Sefer Halilović.

Opravdano su odsustvovali: Azra Hadžiahmetović, Milica Marković i Milorad Živković.

Osim članova Komisije, sjednici su prisustvovali Milenko Pandurević i Nermina Skejović-Hurić iz Ministarstva vanjske trgovine i ekonomskih odnosa BiH.

Zapisnik su vodili Merdžana Iglica, sekretar Komisije za vanjske poslove, i Miroslav Stanišić, stručni saradnik u Komisiji za vanjske poslove.

Sjednicom je predsjedavao Slavko Matić, predsjedavajući Komisije, koji je prisutne upoznao s dnevnim redom 57. sjednice.

Članovi Komisije su za 57. sjednicu Komisije jednoglasno usvojili sljedeći

DNEVNI RED

1. Usvajanje zapisnika 55. i 56. sjednice Komisije za vanjske poslove;
2. Davanje mišljenja o saglasnosti za ratificiranje:
 - a) Štokholmske konvencije o postojanim organskim zagađivačima – Štokholm, 22.5.2001. (resorno ministarstvo: Ministarstvo vanjske trgovine i ekonomskih odnosa BiH);
 - b) Konvencije o privremenom uvozu – ATA Carnet, Istanbul, 26.7.1990. (resorno ministarstvo: Ministarstvo vanjske trgovine i ekonomskih odnosa BiH);
3. Izvještaji i materijali pristigli Komisiji:
 - Informacija o preduzetim aktivnostima u vezi s pristupanjem i ratifikacijom Konvencije UN-a o pravima lica s invaliditetom i Opcionalnog protokola Ministarstva za ljudska prava i izbjeglice BiH;
 - Izvještaj s jesenjih sastanaka Parlamentarne skupštine OSCE-a, održanih u Atini, od 9. do 12. 10. 2009. ;
4. Tekuća pitanja;

Ad. 1. Usvajanje zapisnika 55. i 56. sjednice Komisije za vanjske poslove

Denis Bećirović je u vezi sa zapisnicima kazao da bi u zapisniku trebalo da piše ko je prisutan, a ko odsutan i iznio primjedbe što se ne navodi koji su se članovi Komisije odazvali pozivu za sjednicu Komisije, a ona nije održana zbog nedostatka kvoruma.

Azra Alajbegović kazala je da, ako ćemo u zapisniku pisati ko je prisutan, a ko odsutan, onda bi bilo bolje da se kaže ko je opravdano, a ko neopravdano odsutan.

Denis Bećirović dodao je da bi se u zapisniku moglo reći da li je neko pravdao ili nije svoje odsustvo.

Slavko Matić kazao je da u zapisnicima piše ko je bio prisutan i da se iz toga može zaključiti ko nije prisustvovao sjednici Komisije. On je dodao da su dva člana Komisije za vanjske poslove istovremeno i članovi Kolegija pa ponekad ne mogu prisustvovati sjednicama Komisije zbog prisustva sjednicama Kolegija. On je izrazio očekivanje da će Komisija za vanjske poslove što prije dobiti zamjenu za Sadika Ahmetovića.

Nakon toga, članovi Komisije jednoglasno su usvojili zapisnike 55. i 56. sjednice Komisije, s primjedbama Denisa Bećirovića.

Ad. 2. a) Davanje mišljenja o saglasnosti za ratifikaciju Štokholmske konvencije o postojanim organskim zagađivačima – Štokholm, 22.5.2001.

Nermina Skejović-Hurić iz Ministarstva vanjske trgovine i ekonomskih odnosa BiH kazala je da je Konvencija usvojena 22.5.2001., a stupila je na snagu 17.5.2004. Dodala je da su 168 zemalja članice ove konvencije, a BiH je potpisala ovu konvenciju 23.5.2001. u Štokholmu. Cilj Konvencije je eliminacija i ograničenje proizvodnje i korištenja svih namjerno proizvedenih zagađivača. Konvencijom se također želi postići kontinuirano svođenje na najmanju moguću mjeru, gdje je to moguće, te eliminirati skupljanje nenamjerno proizvedenih organskih zagađivača. Glavni mehanizam za provođenje Konvencije je izrada NIP-a (Nacionalnog implementacionog plana) i za to su izdvojena sredstva za BiH, a putem Globalnog okolišnog fonda izabrana je Agencija za provođenje ovog projekta. Obaveze članica ove konvencije su da provode kontrolu proizvodnje uvoza, izvoza, odlaganja i korištenja zagađivača te da promoviraju najbolje postojeće tehnologije i praksu za zamjenu postojećih zagađivača i da istovremeno sprečavaju razvoj novih. Konvencija je vrlo značajna i sve zemlje u regionu su je ratificirale osim Crne Gore.

Merdžana Iglica pitala je ko će finansirati ovaj projekat.

Nermina Skejović-Hurić kazala je da se, kad se ratificira Konvencija, odmah može krenuti u izradu projekta. Dodala je da je 496 hiljada dolara određeno za Bosnu i Hercegovinu iz Globalnog okolišnog fonda koji će se raspodijeliti preko Agencije za provođenje.

Nakon toga, članovi Komisije jednoglasno su dali pozitivno mišljenje Predstavničkom domu za ratifikaciju ove konvencije.

Ad. 2. b) Davanje mišljenja o saglasnosti za ratifikaciju Konvencije o privremenom uvozu – ATA Carnet, Istanbul, 26.7.1990.

Milenko Pandurević iz Ministarstva vanjske trgovine i ekonomskih odnosa BiH kazao je da je Konvencija o privremenom uvozu sačinjena u Istanbulu 26.5.1990. i objedinjava sve dotadašnje konvencije koje su se odnosile na privremeni uvoz. ATA Carnet je jednostvan međunarodni carinski dokument koji se koristi za pojednostavljivanje privremenog uvoza u zemlju s rokom važenja od godinu dana. Sistem ATA Carneta funkcioniše prema međunarodnoj carinskoj konvenciji koja je u skladu sa Svjetskom carinskom organizacijom. Svjetsko ATA vijeće upravlja sistemom u skladu sa Svjetskom carinskom organizacijom. Konvenciju o privremenom uvozu čini osnovni tekst i 13 aneksa. Svaki aneks odnosi se na određenu kategoriju robe. Karnete izdaju isključivo trgovinske komore učlanjene u međunarodni ATA garantni lanac pri međunarodnom birou trgovinskih komora sa sjedištem u Parizu, koji upravlja tim lancem. Sistem ATA Carneta proširio se s nekoliko najrazvijenijih zemalja zapadne Evrope na gotovo sve industrijski razvijene zemlje. Potpisnice ove konvencije su skoro sve države bivše Jugoslavije. ATA

Carnet sistem pokriva tri glavne kategorije: privremeni uvoz uzoraka, stručne opreme i robe namijenjene izložbama, sajmovima, kongresima i sličnim manifestacijama.

Nije bilo pitanja te su članovi Komisije podržali i jednoglasno dali pozitivno mišljenje Predstavničkom domu za ratifikaciju ove konvencije.

Ad. 3. Izvještaji i materijali pristigli Komisiji:

- **Informacija o preduzetim aktivnostima u vezi s pristupanjem i ratifikacijom Konvencije UN-a o pravima lica s invaliditetom i Opcionalnog protokola Ministarstva za ljudska prava i izbjeglice BiH;**
- **Izvještaj s jesenjih sastanaka Parlamentarne skupštine OSCE-a, održanih u Atini od 9. do 12. 10. 2009.**

Članovi Komisije primili su k znanju navedenu informaciju i izvještaj.

Slavko Matić na kraju se zahvalio članovima Komisije i zaključio sjednicu.

Sjednica je završena u 12,25 sati.

Zapisnik sačinio:

Miroslav Stanišić, stručni saradnik u Komisiji za vanjske poslove.

Sekretar Komisije

Merdžana Iglica

Predsjedavajući Komisije

Slavko Matić

Kopija: MVP-u BiH